

Turkiston

1925-yildan chiqqan boshlagan

«Kamolot» yoshlar ijtimoiy harakati Markaziy Kengashining nashri

www.turkiston.uz

2013-yil 28-sentabr, shanba № 75 (15713)

Ўзбекистон Республикаси Президентининг
ФАРМОНИ

З.Ш.Рўзиёвни Қашқадарё вилояти ҳоқими лавозимига тайинлаш тўғрисида

Ўзбекистон Республикаси Конституциясининг 93-моддаси 15-банди ва 102-моддасига ҳамда халқ депутатлари Қашқадарё вилоят Кенгашининг қарорига мувофиқ:

Зафар Шаропович Рўзиёв Қашқадарё вилояти ҳоқими лавозимига тайинлансин, шу муносабат билан Ўзбекистон Республикаси Қишлоқ ва сув хўжалиги вазири лавозимидан озод этилсин.

Ўзбекистон Республикаси
Президенти **И.КАРИМОВ**

Тошкент шаҳри,
2013 йил 27 сентябрь

Ўзбекистон Республикаси Президентининг
ФАРМОНИ

Т.И.Жўраевни Қашқадарё вилояти ҳоқими лавозимидан озод этиш тўғрисида

Ўзбекистон Республикаси Конституциясининг 93-моддаси 15-банди ва 102-моддасига мувофиқ:

Туробжон Икромович Жўраев Қашқадарё вилояти ҳоқими лавозимидан озод этилсин.

Ўзбекистон Республикаси
Президенти **И.КАРИМОВ**

Тошкент шаҳри,
2013 йил 27 сентябрь

ПРЕЗИДЕНТ ИСЛОМ КАРИМОВНИНГ ХАЛҚ ДЕПУТАТЛАРИ ҚАШҚАДАРЁ ВИЛОЯТИ КЕНГАШИНИНГ НАВБАТДАН ТАШҚАРИ СЕССИЯСИДАГИ НУТҚИ

Ассалому алайкум, ҳурматли депутатлар!
Қадрли дўстлар!

Авваламбор, барчангизни соғ-омон кўриб, сизларга, сизлар орқали бутун Қашқадарё аҳлига ўзимнинг чуқур ҳурматимни билдиришдан хурсандман.

Ҳаммангизга яхши маълум: Қашқадарё менинг ҳаётимда, менинг таассуротимда алоҳида ўрин тутди. Шунинг учун ҳам Қашқадарё аҳли ва фаоллари билан кўп вақт учрашмасам, сизларни соғиниб қолганимни сезиб тураман.

Бугун мана шу залда сиз, азизлар билан учрашувда мен худдики ўз яқин дўстларимни кўргандек бўламан. Минг афсуски, турли-турли ташвишлар Қашқадарёга кўпроқ келишга, сизлар билан учрашиб, жайдари қилиб айтганда, бемалол гурунқ қилишга имкон бермайди.

Орадан қанча вақт ўтмасин, мен айна шу заминда сизлар билан яхши-ёмон кунларда бирга бўлганим, нон-тузингизни тагитганим — буларнинг барчаси ҳеч қачон ёдимдан чиқмайди.

Қашқадарё, ҳақиқатан ҳам, бағри дарё, беқиёс ўлка. Бу воҳа одамлари билан бирга ишлаш насиб этгани, ҳаётимнинг энг жўшқин, энг ҳаракатчан даврида мард ва танти Қашқадарё аҳли билан бир тану бир жон бўлиб меҳнат қилганим, менга шундай ҳаёт мактабини ўташ бахтини бергани учун тақдирдан миннатдорман.

(Давоми 3-бетда)



Сардор Муллажонов фотокolleжи

Ўзбекистон Республикаси Президентининг
ФАРМОНИ

«ЎҚИТУВЧИ ВА МУРАББИЙЛАР КУНИ» МУНОСАБАТИ БИЛАН ТАЪЛИМ-ТАРБИЯ ТИЗИМИДА АЛОҲИДА ЎРНАК КЎРСАТГАН ХОДИМЛАРДАН БИР ГУРУҲИНИ МУКОФОТЛАШ ТЎҒРИСИДА

Мамлакатимиз маънавий-маърифий салоҳиятини юксалтириш, ёш авлодни она Ватанга муҳаббат, истиқлол ғояларига садоқат, миллий ва умуминсоний қадриятларга ҳурмат руҳида соғлом ва баркамол вояга етказишга қўшган салмоқли ҳиссаси, уларга фан асосларини ҳамда замонавий касб-хунарларни ўргатишдаги жонкуярлиги, таълим-тарбия соҳасидаги кўп йиллик самарали меҳнати ва жамоат ишларидаги фаол иштироки учун қуйидагиларга фахрий унвонлар берилсин:

«ЎЗБЕКИСТОН РЕСПУБЛИКАСИ
ХАЛҚ ЎҚИТУВЧИСИ»

Атамуратова Ойтош Маматовна — Ғузур туманидаги 34-умумий ўрта таълим мактабининг бошланғич синф ўқитувчиси, Қашқадарё вилояти

Каримова Осиёхон Абдукадировна — Қўрғонтепа туманидаги 5-ихтисослаштирилган умумий ўрта таълим мактабининг математика ва информатика фанлари ўқитувчиси, Андижон вилояти

«ЎЗБЕКИСТОН РЕСПУБЛИКАСИДА
ХИЗМАТ КЎРСАТГАН
ХАЛҚ ТАЪЛИМИ ХОДИМИ»

Қошанов Турганбай Ережепович — Нукус туманидаги 1-умумий ўрта таълим мактабининг кимё фани ўқитувчиси, Қорақалпоғистон Республикаси

Мухаммадиева Назокат Анорбоевна — Дўстлик туманидаги 6-умумий ўрта таълим мактабининг инглиз тили фани ўқитувчиси, Жиззах вилояти

(Давоми 2-бетда)

Ўзбекистон Республикаси Президентининг
ФАРМОНИ

«ЎҚИТУВЧИ ВА МУРАББИЙЛАР КУНИ» МУНОСАБАТИ БИЛАН ТАЪЛИМ-ТАРБИЯ ТИЗИМИДА АЛОҲИДА ЎРНАК КЎРСАТГАН ХОДИМЛАРДАН БИР ГУРУҲИНИ МУКОФОТЛАШ ТЎҒРИСИДА

(Давоми, боши 1-бетда)

**«ЎЗБЕКИСТОН
РЕСПУБЛИКАСИДА
ХИЗМАТ КЎРСАТГАН
ЁШЛАР МУРАББИЙСИ»**

Абдураимова Махпуба-хан Рузибаевна — Наманган саноат касб-хунар коллежининг махсус фан ўқитувчиси, Наманган вилояти

Бурибеков Анвархўжа Баххауович — Қибрай туманидаги 4-умумий ўрта таълим мактабининг тасвирий санъат ва чизмачилик фани ўқитувчиси, Тошкент вилояти

Бўриева Оватой Мардановна — Сарийосиё туманидаги 27-умумий ўрта таълим мактабининг она тили ва адабиёт фани ўқитувчиси, Сурхондарё вилояти

Жўраев Исроил Нормуродович — Бухоро муҳандислик-технология институти қошидаги 2-академик лицейининг физика фани ўқитувчиси, Бухоро вилояти

Каландаров Махмуд Самандарович — Зарафшон саноат касб-хунар коллежининг ишлаб чиқариш таълими устаси, Навоий вилояти

Тошбаев Ботир Очилбаевич — Пайариқ транспорт касб-хунар коллежининг махсус фан ўқитувчиси, Самарқанд вилояти

Туракулов Эрали Тошбуваевич — Ёзёвон туманидаги 1-болалар ва ўсмирлар спорт мактабининг белбоғли кураш бўйича мураббийи, Фарғона вилояти

Уразов Рахматулла Ашуралиевич — Боёвут туманидаги 1-ихтисослаштирилган мактаб-интернатнинг математика фани ўқитувчиси, Сирдарё вилояти

Хусаинова Халима — Тошкент ахборот технологиялари университети Урганч филиали қошидаги 1-академик лицейининг физика фани ўқитувчиси, Хоразм вилояти

**«ЎЗБЕКИСТОН
РЕСПУБЛИКАСИДА
ХИЗМАТ КЎРСАТГАН
СПОРТ УСТОЗИ»**

Абдураманова Талия Халитовна — Гимнастика бўйича Республика олий спорт маҳорати мактабининг бадий гимнастика бўлими бош мураббийи

Юртимизда таълим тизими-ни замонавий асосда такомиллаштириш, халқимизнинг маданияти ва маънавиятини юксалтириш, ёш авлодни ватанпарварлик, миллий ғояга садоқат руҳида баркамол этиб

тарбиялашга қўшган муносиб ҳиссаси, кўп йиллик фидокорона хизматлари ҳамда жомат ишларидаги фаол иштироки учун куйидагилар мукофотлансин:

**«ФИДОКОРОНА
ХИЗМАТЛАРИ УЧУН»
ОРДЕНИ БИЛАН**

Джумаева Гулсара Мусурмановна — Қумқўрғон туманидаги 2-умумий ўрта таълим мактабининг инглиз тили фани ўқитувчиси, Сурхондарё вилояти

Рузикулов Малик — Тошкент шаҳридаги 21-меҳрибонлик уйи директори

Рустамов Ҳаким Шарипович — Бухоро шаҳридаги 39-ихтисослаштирилган умумий ўрта таълим мактабининг математика ва информатика фанлари ўқитувчиси, Бухоро вилояти

**«МЕҲНАТ ШУҲРАТИ»
ОРДЕНИ БИЛАН**

Абдиев Бахтиёр Бобоназарович — Китоб туманидаги 1-ихтисослаштирилган мактаб-интернатнинг математика фани ўқитувчиси, Қашқадарё вилояти

Абдуллаева Дилбар Ахмадовна — Жиззах шаҳридаги 3-умумий ўрта таълим мактабининг математика фани ўқитувчиси, Жиззах вилояти

Атажонов Озод Артикович — Ҳазорасп туманидаги 32-умумий ўрта таълим мактабининг физика фани ўқитувчиси, Хоразм вилояти

Каримхожаева Замира Шариповна — Қораўзак туманидаги 6-умумий ўрта таълим мактабининг кимё ва биология фанлари ўқитувчиси, Қорақалпоғистон Республикаси

Мамажонов Шухрат Комилович — Фарғона туманидаги 2-ихтисослаштирилган мактаб-интернатнинг кимё фани ўқитувчиси, Фарғона вилояти

Маманазаров Абдумурод Боборахматович — Денов тоғкон саноати касб-хунар коллежининг махсус фан ўқитувчиси, Сурхондарё вилояти

Марданов Абдумўмин Давурович — Қўшрабат туманидаги 13-умумий ўрта таълим мактаби директорининг ўқув-тарбиявий ишлар бўйича ўринбосари, Самарқанд вилояти

Мирвалиева Гавхар Пулатовна — Тошкент шаҳридаги «Мурувват» ногирон болалар учун 2-интернат уйи тарбиячиси

Мурадов Каримжон Кучкарович — Чортоқ педагоги-

ка коллежининг физика фани ўқитувчиси, Наманган вилояти

Танжарова Рано Акрамовна — Олмалик кончилиқ касб-хунар коллежининг чизмачилик фани ўқитувчиси, Тошкент вилояти

Турниёзов Муродулла Камолбоевич — Навоий индустриал-иқтисодиёт коллежининг ишлаб чиқариш таълими устаси, Навоий вилояти

Уралов Абдували Тургунович — Гулистон туманидаги 8-умумий ўрта таълим мактабининг мусиқа фани ўқитувчиси, Сирдарё вилояти

Халимова Нурзода Олимовна — Вобкент қурилиш ва транспорт касб-хунар коллежининг махсус фан ўқитувчиси, Бухоро вилояти

Юнусов Ҳамзабек Умарович — Андижон машинасозлик касб-хунар коллежининг махсус фан ўқитувчиси, Андижон вилояти

**II ДАРАЖАЛИ
«СОҒЛОМ АВЛОД УЧУН»
ОРДЕНИ БИЛАН**

Диланова Гулзамира Гулимбетовна — Кегейли туманидаги 46-умумий ўрта таълим мактабининг бошланғич синф ўқитувчиси, Қорақалпоғистон Республикаси

Зиёев Урал Абулқосимович — Окдарё туманидаги 1-болалар ва ўсмирлар спорт мактабининг юнон-рум кураши бўйича катта мураббийи, Самарқанд вилояти

Мусаев Абдурашит Ибрахимович — Чирчиқ олимпия захиралари коллежининг эшак эшиш бўлими бош мураббийи, Тошкент вилояти

**«ДЎСТЛИК»
ОРДЕНИ БИЛАН**

Абсаламова Мухаббат Қахрамоновна — Зарбдор туманидаги 25-ихтисослаштирилган умумий ўрта таълим мактабининг физика фани ўқитувчиси, Жиззах вилояти

Бабаев Курёзбай Ҳажиевич — Хива қишлоқ хўжалиги касб-хунар коллежининг махсус фан ўқитувчиси, Хоразм вилояти

Бохоров Обитхон Орипович — Қувасой саноат касб-хунар коллежининг ишлаб чиқариш таълими устаси, Фарғона вилояти

Гафарова Махфуза Болтаевна — Самарқанд туризм ва маиший хизмат касб-хунар коллежининг ишлаб чиқариш таълими устаси, Самарқанд вилояти

Дауленова Даригул Прияровна — Нукус шаҳридаги

22-ихтисослаштирилган умумий ўрта таълим мактабининг қорақалпоқ тили ва адабиёти фани ўқитувчиси, Қорақалпоғистон Республикаси

Жўраева Гули Тожиевна — Қизирик туманидаги 2-умумий ўрта таълим мактабининг инглиз тили фани ўқитувчиси, Сурхондарё вилояти

Мирзалимова Хабибахон Рахматалиевна — Поп туманидаги 10-умумий ўрта таълим мактабининг математика фани ўқитувчиси, Наманган вилояти

Мирзоқулов Холмухаммат Турсунбоевич — Бекобод саноат ва транспорт касб-хунар коллежининг махсус фан ўқитувчиси, Тошкент вилояти

Мустафина Гульсара Шевкиевна — Навоий кончилиқ касб-хунар коллежининг махсус фан ўқитувчиси, Навоий вилояти

Нажметдинова Хаמידахон Убайдуллаевна — Гулистон давлат университети қошидаги Гулистон академик лицейининг математика фани ўқитувчиси, Сирдарё вилояти

Орзикулов Ботир Хайдарович — Балиқчи туманидаги 4-умумий ўрта таълим мактабининг кимё фани ўқитувчиси, Андижон вилояти

Пионтковская Алина Николаевна — Олмазор туманидаги 23-ихтисослаштирилган болалар ва ўсмирлар олимпия захиралари спорт мактабининг синхрон сузиш бўйича мураббийи, Тошкент шаҳри

Тўраева Райхон Туробовна — Жондор туманидаги 16-умумий ўрта таълим мактабининг бошланғич синф ўқитувчиси, Бухоро вилояти

Юлдашева Диларам Рахматовна — Қарши шаҳридаги «Мурувват» ногирон болалар учун интернат уйи тарбиячиси, Қашқадарё вилояти

**«ШУҲРАТ» МЕДАЛИ
БИЛАН**

Бахрамова Мархабо Кучкаровна — Зангиота туманидаги 59-умумий ўрта таълим мактабининг она тили ва адабиёт фани ўқитувчиси, Тошкент вилояти

Бердиева Раъно Тураевна — Қарши туманидаги 45-умумий ўрта таълим мактабининг бошланғич синф ўқитувчиси, Қашқадарё вилояти

Бердикулов Анвар Отакулович — Иштихон маиший хизмат касб-хунар коллежининг махсус фан ўқитувчиси, Самарқанд вилояти

Бозоров Обиджон Эшбоевич — Ангор туманидаги 5-

умумий ўрта таълим мактабининг физика фани ўқитувчиси, Сурхондарё вилояти

Бутаева Онархон Шерқўзиевна — Бағдод туманидаги 40-умумий ўрта таълим мактабининг бошланғич синф ўқитувчиси, Фарғона вилояти

Давлетжанова Ойгул Кадамовна — Урганч туманидаги 38-умумий ўрта таълим мактабининг бошланғич синф ўқитувчиси, Хоразм вилояти

Далиева Бибиайим Сарсенбаевна — Шуманай туманидаги 1-умумий ўрта таълим мактабининг география фани ўқитувчиси, Қорақалпоғистон Республикаси

Дехканов Одилжон Юнусалиевич — Норин саноат ва сервис касб-хунар коллежининг махсус фан ўқитувчиси, Наманган вилояти

Жаксимуратова Зернегул Алламуратовна — Чимбой қишлоқ хўжалиги касб-хунар коллежининг математика фани ўқитувчиси, Қорақалпоғистон Республикаси

Ибодуллаева Малохат Исматуллаевна — Шеробод туманидаги 3-умумий ўрта таълим мактабининг бошланғич синф ўқитувчиси, Сурхондарё вилояти

Икрамова Муяссар Эралиевна — Ўрта Чирчиқ туманидаги 72-ихтисослаштирилган умумий ўрта таълим мактабининг физика фани ўқитувчиси, Тошкент вилояти

Йўлдошева Шохида Саъдуллаевна — Хатирчи туманидаги 22-умумий ўрта таълим мактабининг биология фани ўқитувчиси, Навоий вилояти

Каландарова Майрам Жўраевна — Оҳангарон саноат касб-хунар коллежининг махсус фан ўқитувчиси, Тошкент вилояти

Камалова Диларом Туваловна — Жомбой туманидаги 20-умумий ўрта таълим мактабининг физика фани ўқитувчиси, Самарқанд вилояти

Қаржанов Рустам Норматович — Шўрчи туманидаги 7-болалар мусиқа ва санъат мактабининг рубоб ва анъанавий хонандалик синфи ўқитувчиси, Сурхондарё вилояти

Қосимов Нумонжон Абдуллажонович — Косонсой туманидаги 29-болалар ва ўсмирлар спорт мактабининг гандбол бўйича мураббийи, Наманган вилояти

Кулмамадова Холида Рамазоновна — Бухоро туманидаги 25-мактабгача таълим муассасаси тарбиячиси, Бухоро вилояти

(Давоми 3-бетда)

Ўзбекистон Республикаси Президентининг
ФАРМОНИ

«ЎҚИТУВЧИ ВА МУРАББИЙЛАР КУНИ» МУНОСАБАТИ БИЛАН ТАЪЛИМ-ТАРБИЯ ТИЗИМИДА АЛОҲИДА ЎРНАК КЎРСАТГАН ХОДИМЛАРДАН БИР ГУРУҲИНИ МУКОФОТЛАШ ТЎҒРИСИДА

(Давоми,
боши 1-, 2-бетларда)

Курбанов Абдулхафиз Юсупович — Шаҳрихон автомобиль йўллари қурилиши касб-хунар коллежининг махсус фан ўқитувчиси, Андижон вилояти

Курбанов Қадамбай Султанович — Хонқа қурилиш касб-хунар коллежининг ишлаб чиқариш таълими устаси, Хоразм вилояти

Кутлимуратова Гулшан Таджимовна — Беруний туманидаги 1-умумий ўрта таълим мактабининг инглиз тили фани ўқитувчиси, Қорақалпоғистон Республикаси

Мансуров Сайдулла Соҳодуллаевич — Тўрақўрғон қишлоқ хўжалиги касб-хунар коллежининг махсус фан ўқитувчиси, Наманган вилояти

Махсудова Махфиза Бакоевна — Самарқанд шаҳридаги 5-умумий ўрта таълим мактабининг физика фани ўқитувчиси, Самарқанд вилояти

Мирова Дилфуза Сайфуллаевна — Бухоро туризм коллежининг махсус фан ўқитувчиси, Бухоро вилояти

Мунинова Махпратхон Турсуновна — Уйчи туманидаги 26-умумий ўрта таълим мактабининг математика ва информатика фанлари ўқитув-

чиси, Наманган вилояти
Мухтарова Барнохон Озодбековна — Андижон туманидаги 45-умумий ўрта таълим мактабининг биология фани ўқитувчиси, Андижон вилояти

Назаров Ўктам Жўраевич — Бухоро шаҳридаги 24-кўзи ожиз болалар учун ихтисослаштирилган мактабининг она тили ва адабиёт фани ўқитувчиси, Бухоро вилояти

Омонова Гулсора Самановна — Мирзаобод туманидаги 33-ихтисослаштирилган умумий ўрта таълим мактабининг тарих фани ўқитувчиси, Сирдарё вилояти

Пирожкова Наталья Борисовна — Тошкент меҳмонхона хўжалиги касб-хунар коллежининг бош устаси, Тошкент шаҳри

Рўзиев Фарходбек Абдиманнобович — Олтинкўл иқтисодиёт коллежининг информатика фани ўқитувчиси, Андижон вилояти

Сирождидинов Анваржон Холмирзаевич — Ўзбекистон туманидаги 65-ихтисослаштирилган мактабининг инглиз тили фани ўқитувчиси, Фарғона вилояти

Суюнова Хурия Алайдаровна — Бахмал туманидаги 8-умумий ўрта таълим мактабининг биология фани

ўқитувчиси, Жиззах вилояти
Тохтаматова Диларом Уткировна — 1-Республика тиббиёт коллежининг махсус фан ўқитувчиси, Тошкент шаҳри

Тохтаходжаева Мафратхон Махмудовна — Ҳамза туманидаги темир йўл касб-хунар коллежининг махсус фан ўқитувчиси, Тошкент шаҳри

Туйчиев Расулжон Абдумаликович — Қиргули саноат ва қурилиш касб-хунар коллежининг бош устаси, Фарғона вилояти

Узоқов Хусан Кўзиевич — Миришкор туманидаги 2-умумий ўрта таълим мактабининг информатика фани ўқитувчиси, Қашқадарё вилояти

Умарова Нилуфар Закириллаевна — Ангрен политехника касб-хунар коллежининг инглиз тили фани ўқитувчиси, Тошкент вилояти

Уроқова Нафиса Шарофиддиновна — Самарқанд тиббиёт коллежининг махсус фан ўқитувчиси, Самарқанд вилояти

Хажиев Кувандик Садуллаевич — Урганч автомобиль ва йўллар касб-хунар коллежининг махсус фан ўқитувчиси, Хоразм вилояти

Хайитова Дилфуза Жўракўзиевна — Бувайда

туманидаги 34-умумий ўрта таълим мактабининг инглиз тили фани ўқитувчиси, Фарғона вилояти

Хакимова Норбуви Қодировна — Жиззах туманидаги 11-умумий ўрта таълим мактабининг бошланғич синф ўқитувчиси, Жиззах вилояти

Ходжаева Дильдора Абдужабаровна — Юнусобод туманидаги 1-болалар музика ва санъат мактабининг ўзбек халқ чолғулари синфи ўқитувчиси, Тошкент шаҳри

Худойбердиев Фазлиддин Гайбуллаевич — Қизилтепа туманидаги 4-умумий ўрта таълим мактабининг физика фани ўқитувчиси, Навоий вилояти

Хўжабекова Одинахон Хашимовна — Избоскан туманидаги 35-умумий ўрта таълим мактабининг бошланғич синф ўқитувчиси, Андижон вилояти

Шоймардонов Жўракултоевич — Қасби туманидаги 40-умумий ўрта таълим мактабининг меҳнат таълими фани ўқитувчиси, Қашқадарё вилояти

Шубин Вячеслав Егорович

Ўзбекистон Республикаси
Президенти

Тошкент шаҳри,
2013 йил 27 сентябрь

вич — Сув спорти турлари бўйича Республика олий спорт маҳорати мактабининг байдарка ва каноэда эшак эшиш бўлими мураббийи

Шкуров Равшан Тохирович — Шайхонтоҳур туманидаги 15-ихтисослаштирилган болалар ва ўсмирлар олимпия захиралари спорт мактабининг шахмат бўйича мураббийи, Тошкент шаҳри

Эргашева Нодира Косимовна — Сардоба туманидаги 15-умумий ўрта таълим мактабининг она тили ва адабиёт фани ўқитувчиси, Сирдарё вилояти

Эшкватов Нарзилла Эшниязович — Қамаши ахборот технологиялари касб-хунар коллежининг махсус фан ўқитувчиси, Қашқадарё вилояти

Юлдашов Бердибай — Тахиятош энергетика касб-хунар коллежининг информатика фани ўқитувчиси, Қорақалпоғистон Республикаси

Юнусова Зайнаб Маджитовна — Яккабоғ қурилиш-саноат касб-хунар коллежининг ишлаб чиқариш таълими устаси, Қашқадарё вилояти

И.КАРИМОВ

ПРЕЗИДЕНТ ИСЛОМ КАРИМОВНИНГ ХАЛҚ ДЕПУТАТЛАРИ ҚАШҚАДАРЁ ВИЛОЯТИ КЕНГАШИНИНГ НАВБАТДАН ТАШҚАРИ СЕССИЯСИДАГИ НУТҚИ

(Давоми, боши 1-бетда)

Бугунги мажлисимиз, бугунги учрашувимизнинг асосий мақсади авваломбор Қашқадарё воҳасидаги ахвол, аҳолининг кайфияти, дарди, амалдаги ўзгаришлар ва ечимини кутаётган муаммолар, эришилаётган марралар, олдимизда турган вазифаларни муҳокама қилиш, десам, айти ҳақиқатни айтган бўламан.

Халқимизнинг фидойи меҳнати билан қўлга киритган ютуқларимиз билан бирга, йўл қўйилган хато ва камчиликлар ҳақида холисона ва атрофлича фикр юритиб, тегишли хулосалар чиқариш зарурати борлигини, ўйлайманки, ҳаммамиз сезиб турибмиз.

Энг муҳими — бугун ҳаётимизнинг устувор ва ҳал қилувчи йўналишлари бўлиши иқтисодий, ижтимоий, маданий-маънавий соҳалар ривожини таҳлил қилиб, мавжуд муаммоларни ечиш йўллари ҳақида маслаҳатлашиб олсак, ҳар қайсимиз ўз ўрнимизда бизга юкланган вазифаларни аниқлаб олсак, айти муддао бўлар эди.

Қашқадарё охириги йиллар давомида тараққиёт йўлида эришаётган ютуқ

ва марралар ҳақида гапирганда, қуйидаги рақам ва далилларни олиб келиш мумкин.

Авалло, 2012 йилда вилоятда ялпи ҳудудий маҳсулот 4,5 фоизга, қишлоқ хўжалиги 7,3 фоизга, чакана савдо 19,7 фоизга, қурилиш ишлари 12 фоизга, пуллик хизматлар 18,6 фоизга ўсгани ва бошқа кўрсаткичларни таъкидлаш зарур. Жорий йилда ҳам бундай ўсиш суръатлари давом этмоқда.

Эътиборли томони шундаки, вилоят ялпи ҳудудий маҳсулотиде саноатнинг улуши 39 фоизни ташкил қилади. Ҳозирги вақтда мамлакатимиз ялпи саноат маҳсулотининг қарийб 11 фоизи айнан Қашқадарё вилоятида ишлаб чиқарилмоқда.

Бундай натижаларга эришишда вилоятда фаолият кўрсатаётган, мамлакатимиз иқтисодиётининг фахри бўлган йирик замонавий корхоналар катта ҳисса қўшаётганини эътироф этиш лозим. Йилига 125 минг тонна полиэтилен ишлаб чиқариш қувватига эга бўлган Шўртан газ-кимё комплекси негизда иқтисодиётимизда мутлақо янги тармоқ — газни чуқур қайта ишлаш тармоғи вужудга келганини, ушбу корхона янги-янги замо-

навий индустриал мажмуаларни барпо этишда асосий таянч вазифасини бажараётганини алоҳида таъкидлаш керак. Юртимизда шу соҳага мансуб, умумий қиймати 10 миллиард доллардан зиёд бўлган йирик лойиҳаларни амалга ошириш, жумладан, Қашқадарёда энг юксак технологияларга асосланган Шўртан синтетик ёқилғи ишлаб чиқариш мажмуаси, Муборак газ-кимё комплекси каби замонавий саноат корхоналари шулар қаторига киради.

Йирик инвестиция лойиҳаси асосида Талимаржон иссиқлик электр станциясида йилига 900 мегаватт электр энергияси ишлаб чиқариш қувватига эга бўлган иккита буг-газ қурилмасини қуриш ишлари бошлаб юборилди.

Яқин ўтмишимизда тасаввур қилиш ҳам қийин бўлган, ҳақиқатан ҳам энг замонавий технологияларга асосланган бундай лойиҳаларни амалга оширишга қаратилган режаларимиз барчамизни қувонтиради. Шу билан бирга, вилоят иқтисодиётида кўзга ташланётган, ҳаммамизда ташвиш уйғотадиган салбий ҳолатлар ҳам бугун кам эмас.

Бу ҳақда гапирганда, аввало маҳаллий хомашёни қайта ишлаш негизда юқори қийматга эга бўлган рақобатдош маҳсулотлар ишлаб чиқариш бўйича вилоят мамлакатимиз эришган марралардан орқада қолаётганини афсус билан айтишга тўғри келади. Масалан, республикамиз миқёсидаги кўрсаткичларга нисбатан вилоят саноати таркибида енгил саноатнинг улуши 1,7 баробар, озиқ-овқат маҳсулотлари ишлаб чиқаришнинг улуши 3,3 баробар, қурилиш материаллари саноатининг улуши эса 3,6 баробар паст экани шундан далолат беради.

Вилоятда саноат корхоналарининг жойлашувида номутаносиблик ҳолатлари мавжуд. Асосий ишлаб чиқариш қувватлари Қарши шаҳри, Муборак, Ғузор ва Деҳқонобод туманларида жойлашган бўлиб, бошқа туманларнинг бу борадаги ҳиссаси орқада қолаётганини қайд этиш зарур.

Ҳозирги вақтда вилоят бўйича хорижий инвестициялар иштирокидаги 55 та корхона рўйхатга олинган, лекин улардан 7 таси турли сабаблар билан фаолият кўрсатмаяпти.

(Давоми 3-бетда)

ПРЕЗИДЕНТ ИСЛОМ КАРИМОВНИНГ ХАЛҚ ДЕПУТАТЛАРИ ҚАШҚАДАРЁ ВИЛОЯТИ КЕНГАШИНИНГ НАВБАТДАН ТАШҚАРИ СЕССИЯСИДАГИ НУТҚИ

(Давоми, боши 1-, 3-бетларда)

Маҳаллийлаштириш дастури доирасида яратилган имтиёз ва имкониятларга қарамасдан, вилоятда импорт ўрнини босадиган маҳсулотлар ишлаб чиқариш жиддий оқсоқликка юз тутмоқда. Жорий йилнинг ўтган даврида ана шундай маҳсулотларнинг sanoat таркибидаги улуши 0,2 фоизни ташкил этмоқда. Айтишлар, бундай мутлақо қониқарсиз аҳволни қандай изоҳлаш мумкин? Ваҳоланки, бу ерда sanoatни ривожлантириш бўйича қандай кулай шарт-шароитлар, жумладан, табиий газ, нефть, калий, мрамор, марганец, литий, сланец, кўрғошин, рух, қурилиш материаллари хомашёси ва бошқа кўплаб ноёб қазилма бойликларнинг захиралари мавжуд экани ҳақида ортиқча гапириб ўтиришнинг ҳожати йўқ.

Қашқадарё воҳаси қадимдан катта савдо йўллари чорраҳасида жойлашган, турли ўлка ва минтақаларни ўзаро боғлайдиган муҳим стратегик ҳудуд бўлиб келгани ҳаммамизга маълум. Бугунги тил билан айтганда, Қашқадарё айнан йўл-коммуникация, транзит масаласида доим катта салоҳият ва имкониятга эга бўлиб келмоқда.

Вилоятда автомобиль йўллари, темир йўл, ҳаво йўлларининг кенг тармоқлари ва тегишли инфратузилма шаклланди. Лекин, транзит масаласи Қашқадарё учун энг муҳим, катта истикболга эга масала бўлса-да, ана шундай улкан имкониятдан оқилона фойдаланиш, мавжуд транспорт-коммуникация тармоқларининг бугунги ҳолати, уларнинг самардорлигини ошириш масаласи бирон марта жиддий муҳокама қилинмаганини афсус билан қайд этиш лозим.

Эсингиздами, бир пайтлар, Қашқадарё воҳасида собиқ марказдан келган «десантчи»лар ҳукм сурган оғир дамларда, қандай қийин бўлмасин, сизлар билан бирга қанча ишларни амалга оширган эдик.

Қандай янги қурилишлар, қанча янги йўллар барпо қилган эдик. Мана шу Қарши шаҳрининг ўзида 100 километрдан зиёд йўл қурдик. Шуларни эсласам, мен ҳозир ҳам беихтиёр тўлқинланиб, руҳланиб кетаман.

Қани, айтишлар, ўша вақтда бизга четдан келиб биров ёрдам берганмиди? Йўқ. Аввало, Қашқадарёга, унинг халқига раҳмат, у ўзининг ташаббуси, куч-ғайрати, азму шижоати билан шундай катта иш-

ларни амалга оширишга қодир бўлди.

Мен Қашқадарё вилоятига раҳбар бўлиб келганимда, бу ерда «пахта иши» билан айбланиб, бир ярим минг одам қамалган эди. Уларнинг оила аъзолари, қариндош-уруғларини ҳисобга олганда, 150 минг одам совет тузумидан жабр кўрган эди. Ана шу одамларнинг кайфиятини кўтариш, уларни ишга руҳлантириш осонмиди? Ўша пайтда яшаш шароитимиз ҳам қандай бўлгани маълум: кўп нарсани четдан олиб келар эдик, қийинчилик, етишмовчилик кўп эди. Лекин, шунга қарамасдан, одамлар ўртасида меҳр-оқибат, ҳурмат кучли эди. Ана шундай фазилатларни биз доимо асраб-авайлашимиз, мустақамлашимиз керак. Чунки бундай хусусият ва аломатлар бугунги кунда ҳар қачонгидан ҳам ўткир аҳамият касб этмоқда.

Мен ана шундай фазилатларини сақлаб, ўзлигини доимо улуғлаб келаётган, ғурури баланд, ориятли Қашқадарё халқининг фидокорона меҳнати билан бу замин, унинг барча қишлоқ ва шаҳарлари обод ва фаровон бўлишига ишонаман.

Ҳурматли депутатлар!

Мамлакатимизда иқтисодий-етимизнинг ҳал қилувчи тармоқларидан бирига айланиб бораётган кичик бизнес ва хусусий тадбиркорлик соҳаси вилоятда изчил ривожланмоқда. Ялпи ҳудудий маҳсулот таркибида бу соҳанинг улуши 52,4 фоизни ташкил этаётгани, иш билан банд аҳолининг 77 фоиздан зиёди ушбу секторда меҳнат қилаётгани, аҳоли даромадларининг ярмидан кўпи мазкур тармоқ ҳисобидан шаклланаётгани айни шу соҳа бугунги ва эртанги кунимизни ҳал қилувчи тармоққа айланиб бораётганининг яққол исботидир.

Ана шундай муҳим натижаларни эътироф этган ҳолда, бу соҳада айрим муаммолар борлигини ҳам очиқ айтишга мажбурмиз. Масалан, вилоятда рўйхатга олинган 47 минг 400 та кичик бизнес ва хусусий тадбиркорлик субъектидан 3 минг 450 га яқини амалда фаолият кўрсатмаяпти.

Кичик бизнес субъектлари ўз ишини ташкил этиши учун уларга бинолар, ер участкалари ажратиш, муҳандислик-коммуникация тармоқларига улашиш масалаларида турли тўсиқлар ҳали-бери учраб турибди.

Энг ёмони, турли назорат

идоралари томонидан тадбиркорлик субъектлари фаолиятига ноқонуний аралашуш ҳолатлари кўзга ташланмоқда. 2013 йилнинг биринчи ярмида назорат органлари томонидан тадбиркорлик субъектлари фаолияти юзасидан 14 та ноқонуний текшириш ўтказилгани аниқланган. Шунингдек, бир қатор туманлардаги тадбиркорлик субъектларини рўйхатга олиш инспекциялари фаолиятида тадбиркорларнинг ҳуқуқ ва манфаатларини бузиш ҳолатлари қайд этилган.

Шу муносабат билан яна ва яна бир бор таъкидлаб айтмоқчиман: ўз хусусий ишини очиб, нафақат ўзимни, оиламни боқаман, эл-юртга ҳам наф етказаман, деб ҳарқат қилаётган одамларнинг йўлига, тадбиркорлик йўлига ғов бўлиш — бу давлат сиёсати, Президентнинг сиёсати, Президентнинг сиёсати қарши чиқиш, деб баҳолашни керак. Буни барча амалдор шахслар қўлоғига кўрғошиндек қуйиб олсин.

Бу дунёда ҳасад билан эмас, ҳавас билан яшаш, ҳасад, кўролмаслик деган иллатлардан жудо бўлиш керак. Агар ҳар қайси инсон — у фермер бўладими, тадбиркор бўладими — ўзининг ҳалол меҳнати билан даромад топаётган, бойлик орттираётган бўлса, қандини урсин!

Қашқадарёнинг саховатли замини, бу ерда яшаётган деҳқон ва фермерларнинг машаққатли меҳнати, ўз ери, ўз касбига садоқати ҳақида ҳар қанча ҳурмат ва миннатдорлик билан гапирсак арзийди.

Ҳозирги вақтда юртимизда дон ва пахта маҳсулотларининг энг катта қисмини — 12 фоиздан зиёдини айнан Қашқадарё вилояти етказиб бермоқда. Жорий йилда вилоят ғаллакорлари 1 миллион тоннадан ортиқ дон тайёрлаб, мамлакатимиз ғалла хирмони-га улкан ҳисса қўшдилар.

Юртимизда пахта терими қизгин паллага кирган шу кунларда қашқадарёлик омилкор деҳқонлар 420 минг тонналик юксак маррани эгаллаш учун қаттиқ бел боғлаб меҳнат қилмоқдалар.

Қашқадарёнинг мард, миришкор деҳқонларини, уларнинг нималарга қодир эканини мен яхши биламан ва уларнинг фидойилиги билан доимо фахрланаман ва шу фурсатдан фойдаланиб, вилоятнинг барча деҳқон ва фермерларига катта куч-ғайрат, бахт ва омад тилашни, уларнинг олижаноб меҳнати учун

самимий миннатдорлик билдиришни бугун ўзимнинг бурчим, деб биламан.

Ҳаммамиз яхши тушунамиз — бундай мўл ҳосил етиштириш учун аввало тупроқ унмдорлигини, ерларнинг мелиоратив ҳолатини яхшилаш талаб этилади. Шу борада қабул қилинган давлат дастури доирасида Қашқадарё вилоятида кейинги беш йил мобайнида 71 миллиард сўм ҳажмидаги ишлар амалга оширилди. Жумладан, жорий йилнинг ўзида бу мақсадлар учун 14 миллиард сўмдан ортиқ маблағ йўналтирилди.

Сўнгги йилларда сув хўжалиги ташкилотларига лизинг асосида жами 14 миллиард 200 миллион сўмлик 130 та замонавий техника етказиб берилгани ирригация-мелиорация ишларининг самардорлигини оширишга хизмат қилмоқда.

Ана шундай тадбирлар натижасида вилоят бўйича 81 минг гектар суғориладиган майдоннинг мелиоратив ҳолати яхшиланди, ўртача ва кучли шўрланган майдонлар ҳажми 8,5 минг гектарга камайди.

Вилоятда катта-катта майдонларда интенсив мевали боғлар, токзорлар, энгил конструкцияли иссиқхоналар барпо этилаётгани, чорвачилик, паррандачилик соҳалари барқарор ривожланиб, гўшт, сут ва тухум етиштириш ҳажми сезиларли равишда ортиб бораётганини қайд этиш ўринлидир.

Шу билан бирга, қишлоқ хўжалиги соҳасида кўпгина масалалар ўз ечимини кутиб турибди. Жумладан, пахтачилик тармоғида энергия ва сув ресурсларини тежайдиган, замонавий технологияларни жорий этиш, айнан Қашқадарё замини-га мос бўлган тезпишар, касаллик ва зараркундаларга чидамли, серҳосил ғўза навларини кўпайтириш масаласи ҳамон долзарб бўлиб қолмоқда.

Шунингдек, кўп тармоқли фермер хўжалиқларини кўпайтириш ва улар ишлаб чиқарадиган маҳсулотлар бозорини ташкил этиш, қайта ишлаш тармоқларини ривожлантиришда уларга керакли ёрдам ва кўмак бериш каби муҳим вазифалар эътиборимиз марказида туриши лозим.

Биз фермерларни қўллаб-қувватлаш ҳақида кўп гапиримиз. Бугунги кунда фермерларимизнинг ўзига хос муаммолари борки, улар ҳақида ҳам жиддий бош қотиришимиз керак. Ҳозирги вақтда кўп тармоқли фермер хўжалиқларини тузиш, ривожлантиришни

тавсия қиляпмиз. Тавсия бериш осон, лекин бу ишни ташкил қилиш қийин.

Ўзингиз айтинг, кўп тармоқли фермер хўжалиқларининг фаолиятини йўлга қўйиш учун фақат фермерларнинг кучи етадими?

Бу борада энг оғир масала шуки, фермер ўзи етиштирадиган, ишлаб чиқарадиган маҳсулотларни кимга ва қандай сотади? Шунинг учун аввало бундай маҳсулотларнинг бозорини ташкил қилиш ҳақида ўйлаш зарур.

Бу масалада биринчи навбатда давлат, маҳаллий ҳокимликлар ёрдам бериши лозим. Таъбир жоиз бўлса, фермернинг дардини давлатнинг дарди сифатида кўришимиз керак.

Ҳурматли сессия иштирокчилари!

Биз мана шундай мажлисларда қандай муҳим масалаларни муҳокама қилмайлик, биринчи навбатда улар одамларимизнинг кундалик ҳаётига қандай таъсир кўрсатиши, инсон манфаатларига қанчалик жавоб беришини ҳеч қачон эсимиздан чиқармаслигимиз керак.

Бугунги кунда Қашқадарё вилоятида 2 миллион 830 минг аҳоли яшамоқда. Уларнинг 17,5 фоизини мактаб ёшидаги болалар, 27 фоиздан ортигини ёшлар, қарийб 50 фоизини эса аёллар ташкил этади. Кейинги 10 йилда вилоят аҳолисининг сони 1,2 баробар ўсди.

Табиийки, ҳаёт ўзгаришлари билан бирга инсонларнинг талаб ва эҳтиёжлари, орзу-ниятлари, керак бўлса, ташвиш-муаммолари ҳам ўсиб боради. Бу эса биз — раҳбар ва етакчилардан ўз ишимизни танқидий баҳолаб, узоқни ўйлаб, янада фаол ва самарали иш олиб боришни талаб этади.

Шу нуқтаи назардан қарайдиган бўлсак, вилоятда аҳолининг реал даромадлари 2000 йилга нисбатан жон бошига 9,7 баробар кўпайгани, шу даврда ўртача ойлик иш ҳақи 23 марта, пенсия ва ижтимоий нафақалар 12,7 марта ортгани барчамизни қувонтиради.

Охирги ўн икки йилда вилоятда 320 та умумтаълим мактаби, 89 та академик лицей ва касб-ҳунар коллежи, 132 та соғлиқни сақлаш муассасаси, 98 та болалар спорти объекти фойдаланишга топширилгани нафақат шаҳар ва қишлоқлар қиёфасини, балки одамларимизнинг дунёқарashi, ҳаётга муносабатини тубдан ўзгартиришга хизмат қилмоқда, уларнинг эртанги кунга ишончини кучайтирмоқда.

(Давоми 5-бетда)

ПРЕЗИДЕНТ ИСЛОМ КАРИМОВНИНГ ХАЛҚ ДЕПУТАТЛАРИ ҚАШҚАДАРЁ ВИЛОЯТИ КЕНГАШИННИНГ НАВБАТДАН ТАШҚАРИ СЕССИЯСИДАГИ НУТҚИ

(Давоми, боши 1-, 3-, 4-бетларда)

Айни пайтда вилоятда ижтимоий соҳа объектларини қуриш учун бюджетдан ажратилган маблағларни ўзлаштиришда баъзан оқсоқлик ҳолатларига йўл қўйилаётганини, масалан, 2013 йили 2 та касб-хунар коллежи, 11 та мактаб белгиланган муддатда фойдаланишга топширилмаганини айтиш лозим.

Биз учун устувор аҳамиятга эга бўлган яна бир масала — қишлоқ жойларда намунавий лойиҳалар асосида замонавий уй-жойлар қуриш дастури доирасида Қашқадарё вилоятида кейинги тўрт йилда 2 минг 510 та янги, шинам уй-жой ва инфратузилма объектлари барпо этилди.

«Обод турмуш йили» деб ном олган жорий йилда эса яна 1 минг 50 та уй-жой, 32 километр ичимлик суви, 28 километрдан зиёд электр тармоқлари, 40 километрдан ортиқ табиий газ тармоқлари ва 24 километрдан зиёд йўл қуриш бўйича кенг кўламли ишлар олиб борилмоқда. Лекин, афсус билан айтиш керакки, айрим туманларда пудрат ташкилотларини сафарбар этиш, тегишли моддий-техник ресурслар билан узлуксиз таъминлаш, муҳандислик коммуникацияларини олдиндан барпо этиш ишлари талаб даражасида ташкил этилмаган. Бундай ҳолат бугунги кунда белгилаб олган режаларимизни амалга оширишда энг катта тўсиқ бўлиб қолмоқда.

Қурилиш соҳасида пудратчи ташкилотларга алоҳида эътибор бериш, уларнинг муаммоларини ечиш керак. Чунки бундай катта қурилишларни амалга оширишда охириги натижани биринчи навбатда биз кимдан сўраймиз? Пудратчилардан сўраймиз.

Мана, ҳаммангиз хабардорсиз, Шўртан газ-кимё мажмуасини барпо этдик. Бундай ноёб ва улкан саноат комплексини четдан келиб биров қуриб бергани йўқ, ўзимизнинг мутахассисларимиз, қурувчиларимиз бу ишни амалга оширдик.

Шу маънода, биз қишлоқларимизда намунавий уй-жойлар қуриш лойиҳасини шундай юксак талаблар даражасида бажаришимиз керакки, токи шаҳарда яшаётган одамлар ҳам қишлоққа келиб, шундай уйларни олишга талабгор бўлсин.

Мамлакатимизда касб-хунар коллежлари битирув-

чиларини иш билан таъминлаш масаласи ҳозирги вақтда энг муҳим ва долзарб вазифамиз бўлиб, бу борада катта ишлар қилинмоқда. Бироқ, Қашқадарё вилоятида бу масаланинг нафақат иқтисодий, балки ижтимоий-сиёсий аҳамиятга эга эканини чуқур тушуниб етмаслик ҳолатлари кўзга ташланмоқда. Масалан, 2012-2013 ўқув йилида касб-хунар коллежлари битирувчиларининг 12 фоизи коллеж ва корхона ҳамкорлик тизими бўйича ишлаб чиқилган чора-тадбирлар доирасида иш билан ханузгача таъминланмаган.

Такрор айтишга тўғри келади: бу масалага жавобгар ва масъул бўлган туман ва шаҳар ҳокимлари, қолаверса, шахсан вилоят раҳбарларининг бундай ҳолатларга йўл қўйишга ҳаққи йўқ.

Агарки биз инсон тақдири, унинг ҳаётини манфаатларини асосий ўринга қўймасак, ёшларимизни иш билан таъминламасак, фарзандларимиз, келажакимиз олдида хиёнат қилган бўламиз.

Демоқчиманки, агар ёшларни замонавий иш ўринлари билан таъминлаш вазифасини ҳал қилишга ҳам қатъий киришадиган бўлсак, мен аминман, бу борада биз жуда катта имкониятларга эгамиз. Албатта, бу масалада биринчи навбатда иқтисодий замин яратиш керак, акс ҳолда қуруқ даъватлар билан одамларни улғу ишларга сафарбар этиб бўлмайди.

Бу ҳақда кўп гапириш мумкин. Мана, масалан, биз 1997 йилда қабул қилган Кадрлар тайёрлаш миллий дастурини олайлик. Ўша даврда бу дастурни ишлаб чиқиш ва амалга оширишдаги дастлабки қадамлар қандай қийин бўлганини, аввало мутасаддилар, тегишли вазирлик ва идораларнинг раҳбарларига келажакимизни ҳал этадиган бундай буюк ишнинг аҳамиятини тушунтириш, уларни шунга ишонтириш осон бўлмаганини мен яхши эслайман.

Бугунги кунда, ўзингиз кўряпсиз, ана шу миллий дастуримизни, унинг асосида амалга оширилган улкан ишларимизни дунё ҳамжамияти тан олмоқда.

Ҳар қайси ҳудуд ва минтақада одамларнинг кайфияти, маънавий муҳит ва ижтимоий вазият авваламбор қонун ва адолат устуворлигини таъминлашга боғлиқ экани ҳақида кўп гапиришнинг зарурати йўқ, албатта.

Шу кўз билан қараганда,

Қашқадарё вилоятида кейинги пайтда ҳуқуқ-тартибот соҳасида ҳам айрим камчилик ва нуқсонларга йўл қўйилаётганини айтиш керак. Буни 2012 йилда вилоят бўйича умумий жиноятлар сонининг ошгани, жумладан, қасддан одам ўлдириш 33 фоиздан зиёд, товламачилик 83 фоиз, ўлим билан боғлиқ йўл-транспорт ҳодисалари 8 фоиз, безорилик 6 фоиздан зиёд кўпайгани ҳам кўрсатмоқда.

Энг ёмони, ҳуқуқ-тартибот идораларининг баъзи ходимлари ўртасида қонунга хилоф хатти-ҳаракатлар содир этиш, ўз вазифасини суиистеъмол қилиш ҳолатлари учраб турибди. Масалан, кейинги бир ярим йил давомида ички ишлар идоралари ходимларидан 10 нафари жиноий жавобгарликка тортилган. Ўз фаолиятида камчиликларга йўл қўйгани учун вилоят прокурори Х.Турдибоев, вилоят ички ишлар бошқармаси бошлиғи С.Ҳайдаров, Миришкор тумани прокурори А.Журалов, Яккабоғ тумани прокурори С.Юлдошев, Чирокчи тумани ички ишлар бўлими бошлиғи И.Ишмуродов, Миришкор тумани ички ишлар бўлими бошлиғи Ш.Айизов эгаллаб турган лавозимидан озод этилган.

Буларнинг барчаси вилоятда қонунчиликни таъминлаш, аҳолининг ҳуқуқий маданиятини ошириш, аввало ёшлар билан ишлаш бўйича мутасадди бўлган ходимларнинг етарлича иш олиб бормаётгани билан боғлиқ. Бундай камчиликларга барҳам бериш, вилоятда ҳуқуқ-тартибот ишларини самарали йўлга қўйиш юзасидан тегишли идоралар томонидан тез кунларда аниқ чора-тадбирлар кўриш зарур.

Ҳурматли мажлис қатнашчилари!

Қашқадарё воҳасининг бугунги ва эртанги куни, келажак ҳақида сўз юритар эканмиз, бир муҳим масалага эътиборингизни жалб этмоқчиман. Агарки ўзимиз йўл қўйган камчилик ва хатоларга аввало ўзимиз ҳолисона баҳо бериб, уларни бартараф этмасак, ҳеч ким четдан келиб бизнинг ишимизни қилиб бермайди. Бу — ҳаммамизга аён ҳақиқат.

Бугун замон, ҳаётимизнинг ўзи талаб қилаётган тадбир ва режаларимизни амалга оширишда, биринчи навбатда кўпдан бери ечилмасдан, йўлимизни тўсиб турган муаммоларни ҳал қилиш, лўнда қилиб айтганда, вилоятни ҳар

томонлама равнақ топтириш билан боғлиқ устувор вазифалар ҳақида авваламбор бош қотиришимиз керак.

Айни шундай кўз билан қараб, Қашқадарё вилоятининг тараққиёт суръатларини тезлаштириш, бугунги кунда ривож топаётган тармоқлар билан бирга, замонавий технологиялар билан қуролланган, қўшимча қийматга эга бўлган, дунё бозоридаги талабга жавоб берадиган тайёр маҳсулотлар чиқарадиган лойиҳаларни амалга ошириш зарур.

Қисқача айтганда, вилоятда орқада қолаётган енгил, озиқ-овқат, қайта ишлаш саноатини ривожлантириш, инфоформация ва коммуникация соҳаларининг йўлини очиб бериш, шу билан бирга, қурилиш ишлари соҳасига янги куч-қувват бериш масалалари бугун эътиборимиз марказига қўйилмоқда.

Бу борада Ўзбекистон ҳукуматининг Қашқадарё вилояти бўйича мана шундай режаларни ўзида мужассам этган 3 та қарори яқинда қабул қилинган олдимизга, аввало Қашқадарё вилояти фаоллари олдида оғир бўлса ҳам, лекин шарафли вазифалар қўймоқда.

Айниқса, саноат соҳасининг янги турларини ривожлантириш мақсадида келгуси тўрт йилда умумий қиймати — шунга эътибор беринг — 2 миллиард 98 миллион долларга тенг бўлган 555 та лойиҳани амалга ошириш, энг муҳими, 13 мингдан ортиқ янги иш ўрни яратиш кўзда тутилаётганининг ўзи, ўйлайманки, бу ишларнинг кўлами ва миқёсидан яққол далолат беради. Ушбу лойиҳаларни амалга ошириш натижасида вилоятда саноат маҳсулотлари ҳажми 1,2 баробар, жумладан, озиқ-овқат маҳсулотлари 1,6 баробар, қурилиш материаллари 1,8 марта, машинасозлик ва кимё саноати 2,9 карра, ноозиқ-овқат маҳсулотлари ишлаб чиқариш ҳажми эса 1,7 баробар ортishi режалаштирилган.

Дастурда, жумладан, вилоятдаги енгил саноат корхоналарини ривожлантириш орқали экспортбоп замонавий тайёр газлама ва тикув-трикотаж маҳсулотлари ишлаб чиқариш бўйича умумий қиймати 100 миллион доллардан иборат бўлган 82 та лойиҳани амалга ошириш белгиланган. Бу эса 2016 йилга бориб, вилоятда етиштириладиган пахта толасини қайта ишлаш ҳажмини ҳозирги 6 фоиздан 35 фоизга етказиш ва энг муҳими, 4

мингта янги иш ўрни яратиш имконини беради.

Қадрли дўстлар!

Мустақиллик йилларида бутун юртимиз қатори Қашқадарё вилоятини, унинг маркази бўлмиш Қарши шаҳрини янада гўзал ва обод қилиш мақсадида катта ишлар олиб борилаётганига барчамиз гувоҳ бўлмоқдамиз.

Айниқса, шаҳарнинг 2700 йиллиги муносабати билан қандай кенг кўламли қурилиш ва ободончилик дастурлари амалга оширилганини ҳаммамиз яхши эслаймиз ва шундай ишларга ҳисса қўшганимиз билан доимо фахрланиб яшаймиз. Лекин, бошлаган ишларимизни давом эттириш, узоқни кўзлаб, ҳар қайси шаҳар, туман маркази, турар жойларнинг бош режаси лойиҳаларини тузиб, амалга ошириш билан боғлиқ йиғилиб қолган жуда кўп муаммоларни кечиктирмай ҳал қилишни бугун ҳаётнинг ўзи талаб этмоқда.

Айни шу мақсадларни рўйбга чиқариш йўлида авваламбор Қарши шаҳрини янада гўзал, замонавий, барчанинг ҳавасини тортадиган марказга айлантириш учун унинг 2030 йилгача мўлжалланган бош режасини амалга ошириш, шаҳар инфратузилмасини реконструкция қилиш ва таъмирлаш бўйича мамлакатимиз ҳукуматининг қарори ва махсус дастури қабул қилинди.

Ана шу дастурга мувофиқ, биринчи навбатда, Қарши шаҳрининг ҳудудини кенгайтириш кўзда тутилмоқда. Бугунги кунда унинг умумий майдони 8 минг 500 гектардан иборат бўлса, келгусида бу рақам икки баробар ортиб, қарийб 17 минг 700 гектарни ташкил этади.

Йўл-транспорт инфратузилмасини тубдан яхшилаш мақсадида шаҳарни айланиб ўтадиган, узунлиги 56 километр бўлган ҳалқа йўл қурилиши бошлаб юборилди. Мазкур йўлнинг темир йўл ва автомобиль йўллари кесишадиган нуқталарида 6 та замонавий йўл ўтказгич қуриш белгиланган.

Бу лойиҳанинг аҳамиятини шунда кўриш мумкинки, ҳалқа йўл ишга тушиши билан оғир юк машиналари, кўпгина транспорт воситалари шаҳарни айланиб ўтадиган бўлади. Бу эса ўз навбатида ҳаракат хавфсизлигига, экологик муҳит тозаллигига ижобий таъсир кўрсатади.

(Давоми 6-бетда)

ПРЕЗИДЕНТ ИСЛОМ КАРИМОВНИНГ ХАЛҚ ДЕПУТАТЛАРИ ҚАШҚАДАРЁ ВИЛОЯТИ КЕНГАШИНИНГ НАВБАТДАН ТАШҚАРИ СЕССИЯСИДАГИ НУТҚИ

(Давоми, боши 1-, 3-, 4-, 5-бетларда)

Умумий узунлиги 30 километрдан зиёд бўлган 6 та радиаль магистраль йўлни ҳамда шаҳардаги ички йўлларни кенгайтириш ҳисобидан автомобиль транспорти ва пиёдалар учун қулай шарт-шароитлар яратилади.

Шунингдек, Шаҳрисабз, Бухоро, Самарқанд, Термиз йўналишларида янги 5 та автостанция ҳамда Қарши автостанцияси капитал таъмирланади. Шаҳар аҳолисига транспорт хизмати кўрсатиш сифатини ошириш учун ўзимизда, Самарқандда ишлаб чиқарилган 150 та «Исузу» автобуси лизинг асосида харид қилинади.

Қарши шаҳри учун энг ўткир масалалардан бири бўлган ичимлик суви таъминотини яхшилаш мақсадида қарийб 55 километрлик сув тармоқларини янгитдан қуриш ва модернизация қилиш вазифаси ҳам дастурда ўз ифодасини топган.

Шаҳардаги канализация тизимининг техник ҳолатини яхшилаш учун хорижий сармоялар ҳисобидан тозалаш иншоотлари ва 100 километрдан ортиқ оқова сув тармоқлари қурилади ва реконструкция қилинади, юқори қувватга эга бўлган электр тармоғини қуриш, 100 километрдан ортиқ тармоқни реконструкция қилиш режалаштирилмоқда.

Воҳанинг иқлим ва табиий шароитини ҳисобга олган ҳолда, Қарши магистраль каналлари, Қашқадарё ва бошқа каналлар ҳудудидан янги инфратузилма объектлари, оилавий дам олиш масканлари барпо этилади.

Бундан ташқари, шаҳарда 9 та янги майдон, 8 та хиёбон қуриш, мавжудларини реконструкция қилиш, шу тариқа шаҳар аҳолиси ва меҳмонлари учун қулай шарт-шароит яратиш вазифалари ҳам мазкур дастурдан ўрин олганини айтиш лозим.

Шаҳардаги эски, яроқсиз ҳолга келиб қолган бир қаватли айрим бинолар ўрнида 2-3 қаватли замонавий уй-жойлар қад ростлайди. Уларнинг биринчи қаватида аҳолига хизмат кўрсатиш объектлари жойлашади.

Бундай мисолларни яна кўплаб олиб келиш мумкин.

Бир сўз билан айтганда, Қарши шаҳрида кенг кўлам-

ли мазкур дастурни амалга ошириш учун жами 1 триллион сўмдан зиёд маблағ йўналтириш кўзда тутилмоқда.

Азиз дўстлар, барчамиз яхши биламизки, Қашқа воҳасида бутун халқимизнинг фахри, ифтихори бўлган яна бир тарихий шаҳар бор. У ҳам бўлса, қадимий Кеш — Шаҳрисабз дир. Бу гўзал шаҳарнинг мамлакатимиз тарихида, бугунги ҳаётимизда тугган ўрни ва нуфузини ҳисобга олиб, уни ривожлантириш бўйича ҳам махсус дастур асосида катта ишлар режалаштирилмоқда.

Ана шу дастур доирасида Шаҳрисабзнинг юртимиз ижтимоий ва маданий тараққиётидаги аҳамиятини янада ошириш, уни замонавий туризм марказига айлантириш учун мавжуд инфратузилма иншоотларини янгилаш ва реконструкция қилиш бўйича кенг кўламдаги ишлар бажарилади.

Энг аввало, Амир Темур майдонини, унинг ён-атрофидаги ҳудудни янада кенгайтириш, Оксарой комплекси билан Дорус-саодат, Дорут-тиловат, Чорсу бозори, Кўк гумбаз каби тарихий обидаларни боғлаб турадиган янги, гўзал хиёбон барпо этиш орқали бу маскан яхлит тарихий-меъморий мажмуага айланади.

Шаҳрисабзнинг тарихий марказини туташтириб турадиган асосий йўлларни, яъни Ипак йўли кўчасини кенгайтириш, Тарағай Баҳодир ва Шерозий кўчаларини капитал таъмирлаш орқали шаҳарнинг ички халқа йўлини барпо этиш таъминланади.

Шаҳарнинг туристик салоҳиятини янада юксалтириш мақсадида, Осиё тараққиёт банкининг кредити ҳисобидан Шаҳрисабз ва Қарши шаҳарларини боғлайдиган 129 километрлик магистраль йўлни қуриш бўйича тайёргарлик кўрилмоқда.

Белгиланган ана шу барча режа ва лойиҳаларни оқилона, самарали амалга ошириш учун ҳаммамиз бир ёқадан бош чиқариб иш олиб борсак, ўйлайманки, Қарши ва Шаҳрисабз наинки мамлакатимиз, балки минтақамиздаги энг гўзал ва обод шаҳарларга айланади, иншоолло.

Азиз дўстлар!

Ҳаммамиз яхши тушунамиз, юқорида тилга олинган қарорлар, дастур ва режалар

ортида Қашқадарёда яшаётган минг-минглаб одамларнинг ҳаёти, эртанги куни, тақдири турибди.

Бундай улугвор вазифаларни бажаришда кўп нарса Қашқадарё вилояти бошқарувида раҳбарлик вазифасида ўтирган шахсларга, энг аввало, вилоятда ишни ташкил этиб, узоқни кўзлаб, шу мақсадга интилган фаолларни ўз ортидан эргаштира оладиган биринчи раҳбарнинг масъулиятига боғлиқ.

Кейинги икки йил давомида Қашқадарё вилояти ҳокими вазифасида ишлаб келаётган Туробжон Жўраевнинг авваламбор иш фаолиятига баҳо берадиган бўлсак, кўзга ташланаётган салбий ҳолатлар тобора кўпайиб бораётганини сезмаслик, кўрмаслик мумкин эмас.

У ҳам бўлса, етакчи вазифасини зиммасига олган раҳбар ва кўпчилик фаоллар ўртасида, аҳоли ўртасида узилиш пайдо бўлган ва бу ҳолни афсус билан таъкидлашимиз даркор.

Қашқадарёдек катта бир вилоятга раҳбар бўлиш масъулиятини елкасига олган бу одамнинг авваламбор кенг миқёсда фикрлашга, ён-атрофидаги раҳбарлар ва фаоллар билан тил топишиб ишлаш, керак бўлса, ўзини оддий инсонларнинг ўрнига қўйиб, ўзини улар каби тасаввур қилишга, лўнда қилиб айтганда, аҳоли ҳаёти билан яшаш, вилоятнинг кўпгина ўзига хос тамойилларини, сирларини ўрганишга, чуқур англаб олишга қурби етмади.

Т.Жўраевнинг қўл остидаги одамларга ҳурмат ва ишонч билдириб, улар билан баҳамжиҳат ишлаш, уларни умумий мақсадларга сафарбар қилиш, фаолларнинг фикрига, маслаҳатларига суяниш ўрнига манманликка берилгани носоғлом вазиятга, нохуш ҳолатларга олиб келди.

Икки йил давомида вилоятнинг кўпқиррали иқтисодиётининг ўта мураккаб тармоқларидаги турли муаммоларнинг, жойларда мавжуд бўлган, одамларни қийнайдиган ғам-ташвишларнинг ичига чуқур кириш, ҳар томонлама ўйлаб иш тутиш ўрнига, буйруқбозлик услубидан кўпроқ фойдаланиб раҳбарлик қилишга бугунги замон чидамайди.

Ўзининг иш фаолиятида атрофдагиларга юқоридан қараш, уларни менсимаслик,

одамларга нисбатан кўполлик, ўзини тутолмаслик раҳбарнинг обрўсига ҳеч қачон обрў қўшмайди. Шу борада Амир Темур бобомизнинг бизга қолдирган чуқур маъноли насиҳатларини, «Куч — адолатда» деган ўлмас фикрларини ҳеч эсимиздан чиқармасликни истардим.

Қашқадарё эли яхшиликнинг қадрига етадиган, ўзини ҳурмат қилган одамга албатта ҳурмат кўрсатадиган, керак бўлса, уни эъзозлаб, бошига кўтарадиган халқ. Буни тушунган — тушунади, тушунмаган — тушунмайди.

Қашқадарё халқи кўпни кўрган, оққўнгил, заҳматкаш, ишнинг негизини билладиган халқ сифатида ном қозонган. Ўзини раҳбар деган инсон одамлар назарида қандай обрў-эътиборга лойиқ эканини доимо сезиб, англаб юриши, у бошқарадиган халқ ҳаёти билан яшаш, ўзига зеб қўймаслик билан бошқаларга ўрнатилган шарт. Ана шундагина бундай раҳбар нафақат ақл-заковати, қатъият ва талабчанлиги билан, балки ўзининг юриш-туриши билан эл-юрт ўртасида обрў қозонади.

Афсуски, вилоят ҳокими Т.Жўраев бу ерда яшаётган одамларга мансуб хусусиятларни, уларнинг фикри зикрини, дарду ташвишларини ҳар томонлама тушуниб, англаб етиш, вилоятнинг улкан салоҳиятидан фойдаланиб, ишни тўғри ва самарали ташкил этишда заифлик қилди.

Ишда йўл қўйган хато ва камчиликларини Т.Жўраевнинг ўзи ҳам тан олиб, эгаллаб турган вазифасидан озод қилишни сўраб, ариза билан мурожаат қилган. Шу муносабат билан сизлардан Т.Жўраевни Қашқадарё вилояти ҳокими лавозимидан озод қилиш бўйича ўз фикрингизни билдиришингизни сўрайман.

Энди ижозатингиз билан вилоятнинг янги ҳокимини сайлаб олиш масаласига ўтсак.

Биз вилоят ҳокими лавозимига номзод танлашда депутатлар ва фаоллар, кўпни кўрган оқсоқоллар билан атрофлича маслаҳатлашдик. Ана шундай фикр алмашувлардан кейин ҳозирги вақтда Қишлоқ ва сув хўжалиги вазири бўлиб ишлаб келаётган Зафар Рўзиев номзодини Қашқадарё вилояти ҳокими лавозимига тавсия этиш-

га қарор қилдик.

Ўйлайманки, бу номзодни барчангиз яхши танийсиз, яхши биласиз. Унинг таржимаи ҳоли ҳақида қисқача тўхталадиган бўлсак, у 1964 йилда Қашқадарё вилоятининг Китоб туманида туғилган. Мутахассислиги инженер-механик, Тошкент ирригация ва қишлоқ хўжалигини механизациялаш муҳандислари институтини битирган. Қашқадарё вилояти ҳокимлигининг котибияти мудири, вилоят қишлоқ ва сув хўжалиги бошқармаси бошлигининг биринчи ўринбосари, Яккабоғ тумани ҳокими, қишлоқ ва сув хўжалиги вазирининг ўринбосари, Ўзбекистон Республикаси Президенти Давлат маслаҳатчисининг ўринбосари, қишлоқ ва сув хўжалиги вазири вазифасини бажарувчи каби масъул лавозимларда хизмат қилган. 2010 йилдан буён қишлоқ ва сув хўжалиги вазири бўлиб ишлаб келмоқда.

Бир сўз билан айтганда, бу инсон етарлича ҳаёт ва иш тажрибасига эга, энг муҳими, у Қашқадарё вилоятининг пасту баландини, бу заминда яшаётган одамларнинг табиати, орзу-интилишларини яхши билади.

Сиз, ҳурматли депутатлардан ана шу номзод бўйича ўз муносабатингизни билдиришингизни сўрайман.

Қадрли дўстлар!

Қашқадарёнинг қутлуғ заманида улуг ишларга, катта мардлик ва матонат кўрсатишга қодир бўлган халқ яшайди. Ўз юрти, ўз ғурурини доимо қадрлаб яшайдиган ана шундай бағрикенг, иродаси мустақам элга бош бўлиш, етакчилик қилиш, айтиш керакки, ҳар қандай раҳбар учун улкан бахт, улкан шарафдир.

Мен ишонаман, ҳозиргина сизлар билан бирга сайлаб олган янги ҳоким, мана шу ҳақиқатни чуқур англаган ҳолда, шу элнинг ҳурматини қозониш, унинг бунёдкорлик салоҳиятини юзага чиқариш учун ўзини аямасдан, бутун борлигини бериб меҳнат қилади.

Айни шу аснода олдимизда турган катта вазифаларни амалга ошириш, мавжуд муаммоларни бартараф этиш, Қашқадарёни мамлакатимизнинг энг жадал ривожланаётган, бошқаларга ўрнатилган ва намуна бўладиган вилоятига айлантириш йўлида барчангизга сиҳат-саломатлик, бахт ва омад, хонадонларингизга файзу барака тилайман.

ХАЛҚ ДЕПУТАТЛАРИ ҚАШҚАДАРЁ ВИЛОЯТИ КЕНГАШИНИНГ НАВБАТДАН ТАШҚАРИ СЕССИЯСИ

Шу йил 27 сентябрь куни Халқ депутатлари Қашқадарё вилояти кенгашининг навбатдан ташқари сессияси бўлиб ўтди.

Сессияда Ўзбекистон Республикаси Президенти Ислон Каримов нутқ сўзлади.

Президентимиз Қашқадарё вилоятида эришилаётган ютуқ ва марраларни атроф-лича таҳлил қилар экан, қуйидаги рақам ва далилларга алоҳида эътибор қаратди.

2012 йилда вилоятда ялпи ҳудудий маҳсулот 4,5 фоизга, қишлоқ хўжалиги 7,3 фоизга, чакана савдо 19,7 фоизга, қурилиш ишлари 12 фоизга, пуллик хизматлар 18,6 фоизга ўсганини таъкидлади. Жорий йилда ҳам бундай ўсиш суръатлари давом этмоқда.

Вилоят ялпи ҳудудий маҳсулотини саноатнинг улуши 39 фоизни ташкил қилади. Мамлакатимиз ялпи саноат маҳсулотининг қарийб 11 фоизи Қашқадарё вилоятида ишлаб чиқарилмоқда, деди давлатимиз раҳбари.

Ҳозирги вақтда мамлакатимизда дон ва пахтанинг энг катта қисмини — 12 фоиздан зиёдини айнан Қашқадарё вилояти етказиб бермоқда.

Президентимиз вилоятда эришилган ютуқларни қайд этиш билан бирга йўл қўйилган айрим камчилик ва нуқсонлар, мавжуд муаммолар

ҳақида ҳам тўхталиб ўтди.

Сессияда ташкилий масала кўрилди.

Т.Жўраев Қашқадарё вилояти ҳокими лавозимидан озод қилинди.

Ўзбекистон Республикаси Президенти Ислон Каримов тавсиясига кўра Ўзбекистон Республикаси қишлоқ ва сув хўжалиги вазири вазифасида ишлаб келаётган Зафар Рўзиев Қашқадарё вилояти ҳокими этиб тасдиқланди.

Сессияда сўзга чиққан Шаҳрисабз технология касб-хунар коллежи директори Ислониддин Аброров, «Маҳалла» хайрия жамоат фонди республика бошқаруви раисининг биринчи ўринбосари Долли Аллаев, Китоб тумани ижтимоий-иқтисодий касб-хунар коллежи директори Муниса Суюнова, «Нуроний» жамғармаси вилоят бўлими раиси Январ Иноятов, вилоят қасаба уюшмалари ташкилотлари бирлашмаси кенгаши раиси Эсон Ражабов, Нишон туманидаги «Майна Қурбонова» фермер хўжалиги раҳбари Майна Қурбонова, Қарши давлат университети талабаси Мафтуна Нодирова

ва бошқалар Президентимиз нутқида баён этилган танқидий фикрлардан зарур ҳулосалар чиқариб, кўрсатиб ўтилган камчилик-нуқсонларни бартараф этиш, вилоятни ижтимоий-иқтисодий ривожлантиришга қаратилган долзарб вазифаларни муваффақиятли адо этиш, ислохотларимиз самарасини ошириш учун бутун Қашқадарё аҳли астойдил меҳнат қилади ва кўзланган марраларга албатта эришади, деб таъкидладилар.

Президентимиз Ислон Каримов шу куни Касби туманидаги «Шоназар ота Авазмуродов» фермер хўжалиги далаларида фермерлар билан мулоқотда бўлди.

Сирожиддин Шоназаров раҳбарлик қилаётган мазкур фермер хўжалиги бу йил 35,7 гектар майдонда пахта етиштирди. Давлатга пахта ва галла сотиш шартнома мажбуриятларини мунтазам бажариб келаётган ушбу хўжаликда ҳосилдорлик йилдан-йилга ошиб бормоқда.

— Бу йил пахтадан мўл ҳосил етиштирилди, — деди

Юртбошимиз. — Бу соҳада эришаётган муваффақиятларимизни чуқур таҳлил қиладиган бўлсак, авваламбор, ерни ҳақиқий эгаларига топширганимиз, фермерларимизда эгаллик ҳисси шаклланиши, агротехник тадбирлар ўз вақтида амалга оширилаётгани, деҳқонларимизга унумли меҳнат қилиши учун яратилаётган кенг шарт-шароит ва имкониятлар бугунги ютуқларимизнинг муҳим омили бўлмоқда.

Давлатимиз раҳбари пахтачиликда ҳудуд иқлими ва тупроқ шароитига мос серҳосил, сифатли тола берадиган янги навларни яратиш масаласига алоҳида тўхтади.

Пахтачининг хусусиятлари, сифат кўрсаткичлари жуда кўп, деди Президентимиз. Ҳосилдорлигининг юқорилиги, зарарқунандаларга чидамлилиги, толасининг узунлиги, пишқилиги ва текислиги шулар жумласидандир. Пахта етиштиришда, авваламбор, нав танлашда ана шу талаблардан келиб чиқиб иш тутиш зарур. Бугун сифатли пахта етиштиришдан аввало фермерларнинг ўзи манфаатдор. Улар қанча сифатли пахта

тайёрласа, шунча кўп даромад топади.

Бугун фермерлик ҳаракати ривожланишининг янги босқичига қадам қўймоқда. Фермер қишлоқ хўжалигининг ва ишлаб чиқаришнинг бошқа тармоқларини ривожлантириши, хизмат кўрсатиш ва сервис соҳасини йўлга қўйиши, ҳудудларимизнинг ижтимоий-иқтисодий равангага, аҳоли фаровонлигини оширишга, одамларни, биринчи навбатда, ёшларни иш билан таъминлашга фаол ҳисса қўйиши лозим, деб таъкидлади давлатимиз раҳбари.

Фермерлар билан мулоқот чоғида одамларимизнинг яшаш тарзи, онгу тафаккури, талаб ва эҳтиёжлари ўзгараётгани, шаҳар ва қишлоқларимиз янада чирой очиб бораётгани таъкидланди. Айниқса, ёшларимиз ўз олдига аниқ мақсадлар қўйиб, дадил интилаётгани, барча соҳаларда катта ютуқларга эришаётгани халқимиз қалбини ғурурга тўлдирётгани қайд этилди.

Анвар САМАДОВ,
ЎЗА махсус муҳбири

Инновацион ғояларнинг амалдаги ифодаси

Пойтахтимиздаги «Ёшлар ижод саройи»да бўлиб ўтган анъанавий «Ватан тараққиётига менинг ҳиссам» мавзуидаги кўرғазмада тадбиркорларнинг энг сўнгги маҳсулотлари намойиш этилди. Тошкент шаҳар ҳокимлиги, «Камолот» ёшлар ижтимоий ҳаракати шаҳар кенгаши, Республика «Хунарманд» уюшмаси, Савдо-саноат палатаси ҳудудий бошқармалари ва бир қатор ташкилотлар ҳамкорлигида ўтказилган ушбу кўрғазмада пойтахтлик ёш хунарманд ва тадбиркорлар, ўз инновацион ғоя ва ишланмаларига эга йигит-қизлар, таълим, ишлаб чиқариш, тижорат тузилмалари вакиллари иштирок этди.

Ўзига хос «ижод ва гўзаллик» байрамига айланган мазкур кўрғазма икки кун давомида томошабинлар диққат марказида бўлди. Кўрғазма экспозициясидан турли хунармандлик ва заргарлик буюмлари, миллий либослар, тақинчоқлар, пишириқлар, ўйинчоқлар, расмлар, техник ишланмалар ўрин олди. Ҳаммаси бир-биридан гўзал, бежирим. «Сатин» ва «Бону» тикувчилик фирмасининг замонавий атлас кўйлақлари, «Замин гўзаллиги» масъулияти чекланган жамиятининг юмшоқ кўрпа-ёстиқларию «Funny toys-plast» ўйинчоқлари, ёш расомларнинг ижодий ишлари... «Sweet fruit cand» хусусий корхонасининг мазали ширинликлари. Тошкент хизмат кўрсатиш ва сервис касб-хунар коллежи ўқувчиларининг гулли тарвузларию медали қўшлари...

Учтепа тумани миллий хунармандчилик касб-хунар коллежи ўқувчиси Абдулла Эргашовнинг хунармандчилик намуналари то-

мошабинларда катта қизиқиш уйғотди. Иккинчи бор ушбу кўрғазмада қатнашаётган Абдулла лаган, пичоқ, қошиқ ва кўзаларни миллий нақшлар билан безатди. Унинг ажойиб санъат асарлари иштирокчиларнинг эътиборини тортди. Кўрғазма иштирокчилари завқ-шавқ билан томоша қилишди, қизиқувчилар шу ернинг ўзида ташкил этилган «ўқув машғулоти»да қатнашиб, гўзаллик яратиш сирларини ўрганишди.

— Кўпроқ кулолчилик намуналари ёқди, — дейди Тошкент шаҳар меҳр-шафқат касб-хунар коллежи ўқувчиси Малоҳат Жамолова. — Оддий лойдан ҳам турли бежирим кўза ва ўйинчоқлар ясама бўлар экан. Мана, ўз қўлим билан гулли саватча ясадим. Буни кулол Дилфуза Эсоналиеванинг машғулотида ўргандим.

— Кўрғазмада инновацион технологияларга оид сўнгги янгилıklarдан бохабар бўлдим, — дея дугонасининг гапига қўшил-

ди Зиёда Азимова. — Бир ихтирочи сувни тозалайдиган қурилма ўйлаб топган бўлса, яна бири интернетда миллий болалар ўйинларини яратибди. Тўғриси, уларни кўриб лол қолдим.

Кўрғазмада меҳнат ярмаркаси ҳам ташкил этилди. Унда Тошкент шаҳар меҳнат ва аҳолини ижтимоий муҳофаза қилиш бош бошқармаси ўн олти мингта бўш иш ўрни билан қатнашди.

— Бугун ўн битта тумандаги бўш иш ўринлари билан қатнаш-япмиз, — дейди Тошкент шаҳар меҳнат ва аҳолини ижтимоий муҳофаза қилиш бош бошқармаси таҳлил бўлими бошлиғи ўринбосари Дилдора Муҳиддинова. — Бу ерда ҳар бир касб-хунар коллежи ўқувчиси ўз мутахассислиги бўйича маъқул келган бўш иш ўринлари билан танишиш имкониятига эга. Улар шу ернинг ўзида иш берувчи ташкилотлар билан шартномалар тузишяпти.

Ушбу жараёни кузатиб, мазкур кўрғазма ёшлар учун нақадар долзарб эканлигига амин бўлди.

Кўрғазма давомида ёш тадбиркорларнинг билим ва малакасини оширишга қаратилган семинар-тренинглар ташкил этилди. Унда Ҳаракатнинг Тошкент шаҳар кенгаши қошидаги «Ёш тадбиркор» консультатив маркази координатори Бекзод Мўминов «Камолот» ЁИХ томонидан ёш тадбиркорларни қўллаб-қувватлашга қаратилган «Менинг бизнес ғоям», «Ёш тадбиркор — юртга мадақдор», «Ёш тадбиркор — келажакка пойдевор» лойиҳалари ҳақида маълумот берди.



Ушбу танловларнинг ғолиблари ҳамкор банкларнинг имтиёзли кредитларини олиш имкониятига эга бўлади. Кредит фоизлари эса «Камолот» ЁИХ Марказий Кенгаши томонидан тўлаб берилди. Ҳаракатда шундай имконият мавжуд. Фақат бу ҳақда озгина қизиксак, билсак ва ундан унумли фойдалансак, бас.

Семинарда «Микрокредит-банк» очик акциядорлик тижорат банкининг амалиёт бошқармаси раиси ўринбосари Мирзоҳид Жабборов тадбиркорлик фаолиятини бошламоқчи бўлган ёшларга имтиёзли кредит олиш имкониятларини тушунтириб берди. Ёшлар эса тадбиркорликни бошлаш учун амалий кўникмаларга эга бўлди.

Навбат «Миллий хунармандчиликни ривожлантиришда устоз-шогирд анъаналари» мавзуидаги амалий машғулотларга етди.

— Шу ернинг ўзида кўзача ясадим, мана, — дейди «Мурувват» имконияти чекланган болалар 1-интернати тарбияланувчиси Раҳим Ҳамидов. — Қоғозга чиройли расмлар чизишни ҳам ўрган-

дим. Энди келажакда рассом ёки хунарманд уста бўламан.

Амалий машғулотлар қизиқарли ўтди. Бир пайт нигоҳлар кичкина «Антиқа уй»га тушди. Уйча макарондан қилинган эди. Ушбу санъат намунаси муаллифи Тошкент хизмат кўрсатиш ва сервис касб-хунар коллежи ўқувчиси Воҳид Зиёдов экан. У ўтган йили Ўзбекистон ошпазлар уюшмаси томонидан ташкиллаштирилган «Қабоб байрами»да биринчи ўринни олган. Миллий рассомлик ва дизайн институти талабаси Олим Абдуллаевнинг ажойиб «Болалар боғи» архитектураси ҳам иштирокчиларда катта қизиқиш уйғотди.

Кўрғазма якунида фаол қатнашчиларга «Камолот» ЁИХ Тошкент шаҳар кенгаши ҳамда Республика «Хунарманд» уюшмаси томонидан диплом, совғалар топширилди.

Қумар БЕГНИЯЗОВА,
«Turkiston» муҳбири.
Сардор Муллажонов олган сурат

Ўн асрга тенг бобочинор

Сиз суратда кўриб турган чинор Сурхондарё вилояти Бойсун туманининг Сайроб қишлоғида кўкка бўй чўзиб турибди. Ёши улугларнинг айтишича, унинг экилганига салкам ўн аср бўлган.

Чинорнинг баландлиги 26, шох-шаббалари диаметри 21 метр. Йиллар давомида унда табиий кавак ҳосил бўлган. Чоғроққина хонани эслатувчи бу кавакнинг кенглиги уч ярим, баландлиги ўн икки ярим метр.

Ўтган асрнинг бошларида чинор бағридаги мўъжаз кавак мактаб вазифасини ўтаган. Кейинчалик ундан идора, кутубхона, савдо дўкони сифатида фойдаланилган.

Мустақиллик йилларида ушбу бобочинор табиат ёдгорлиги сифатида давлат қарамоғига олинган.

Наргиза РАҲМАТУЛЛАЕВА,
«Turkiston» муҳбири



Fotoniqoh

Билимлар географияси

Жорий ўқув йилининг илк ойи республикамизнинг барча умумтаълим мактабларида «География ва иқтисодий билим асослари фани ойлиги» деб эълон қилинган эди. Мазкур фан ойлигида Тошкент шаҳар Сергели туманидаги 301-мактабда ҳам самарали ишлар қилинди. Сентябрь ойи давомида мактабда ушбу фанларга оид тадбирлар, кўргазмалар ташкил этилиб, ўқувчиларга янги билимлар бериб борилди. Фан ойлиги якуни сифатида «Мен нечун севаман Ўзбекистонни?» номли илмий, адабий, бадиий беллашув ташкил этилди.

Ўқувчиларнинг Ўзбекистон табиий географияси ва иқтисодиёти юзасидан билимларини синовдан ўтқа-

зиш беллашувнинг бош мақсади этиб белгиланди.

Беллашувда 7-«А» синфининг «Эверест», 7-«Б» синфининг «Глобус» жамолари иштирок этди. «Ўзбекистон — онам» номли биринчи шартда иштирокчилар она диёримиз тўғрисида инглиз тилида маълумот бердилар. Беллашув давомида ўқувчилар «Географик атамалар луғати», «Дунё дарёлари»,

«Кроссвордлар ва ребуслар ечими» каби шартлар бўйича ўз иқтидори ва билимларини намоён этдилар. Тадбир давомида ўқувчиларнинг дарслар жараёнида эгаллаган билимлари мустақамланди.

Беллашувда «Эверест» жамоаси ғолиб бўлди.

Карима ИСЛОМОВА,
Сергели туманидаги 301-мактаб ўқитувчиси

Fan oyligi

Qishloq Qurilish Bank

ЎРМАТЛИ УСТОЗЛАР!

ОАТБ «Қишлоқ қурилиш банк» барчангизни 1 октябрь — ўқитувчи ва мураббийлар кунин билан самимий муборакбод этади!
Сиз азизларга мустақам соғлиқ, оилавий бахт ҳамда улугвор ишингизга омад тилаймиз.



Шу фурсатдан фойдаланиб, барча юртдошларимизга қуйидаги янги омонат турларини таклиф этамиз.

МИЛЛИЙ ВАЛЮТАДА:

«Мустақил диёр» — муддати 2 ой
«Ҳумо» — муддати 2-6 ой
«Истиқлол» — муддати 6 ой

ХОРИЖИЙ ВАЛЮТАДА:

«Стимул» — муддати 1-3 ой

Банкдаги омонатлар Ўзбекистон Республикаси Президентининг 2008 йил 28 ноябрдаги «Фуқароларнинг Ўзбекистон Республикаси тижорат банкларидаги омонатларини химоялаш кафолатларини таъминлашга оид қўшимча чора-тадбирлар тўғрисида»ги фармони асосида тўлиқ кафолатланади.

Мурожаат учун телефонлар:
(+99871) 150-76-53, 150-39-93
www.qqb.uz

«Қишлоқ қурилиш банк» — фаровон ҳаётингиз хизматида!

Полвонлар мусобақаси

Буюк Британиянинг Бредфорд шаҳрида 8-9 ноябрь кунлари эркаклар, аёллар ва ёшлар ўртасида кураш бўйича Ислон Каримов 10-халқаро турнири бўлиб ўтади.

Мазкур халқаро мусобақада жаҳоннинг ўттизга яқин мамлакатидан полвонлар иштирок этиши кутилмоқда. Ҳозирча айнан қанча спортчи мусобақада иштирок этиши номаълум. Буюк Британия 2000 йилдан буён ушбу мусобақани ўтказиб келмоқда.

Атлетчиларимиз сараланди

Ўзбекистон оғир атлетика федерацияси 16 октябрдан 27 октябрга қадар Польшанинг Вроцлав шаҳрида ўтказиладиган жаҳон чемпионатида иштирок этадиган спортчиларимиз рўйхатини эълон қилди.

Сақиз нафар спортчимиз терма жамоадан ўрин эгаллади. Маҳлиё Тоғаева (48 килограммгача), Марина Сисоева (53 килограммгача), Манзураҳон Мамасолиева (69 килограммгача), Руслан Макаров (62 килограммгача), Достон Якубов (69 килограммгача), Улуғбек Алимов (77 килограммгача), Сардорбек Дўстмуродов (105 килограммгача), Руслан Нуриддинов (105 килограммгача) каби спортчиларимиз юртимиз шарафини химоя қилади.

Юртдошимиз муҳим ўйинда

Сеулдаги «World Cup» стадионида 12 октябрь кунини бўлиб ўтадиган Жанубий Корея ва Бразилия ўртоқлик учрашувини ўзбекистонлик ФИФА рефериси Равшан Эрматов бошқариши маълум бўлди.

Маълумотларга қараганда, Жанубий Корея футбол федерацияси ҳақамимизни сўраб, ЎФФга мурожаат қилган. Федерациямиз ҳам унинг илтимосини қондирган. Жанубий Корея — Бразилия ўйинида Равшан Эрматовга қанотларда Абдулхамидулло Расулов ва қирғизистонлик Баҳодир Қўчқоров ёрдам беради. Ўйин Тошкент вақти билан 17:00 да бошланади.

Жавоҳир КАРОМАТОВ,
«Turkiston» муҳбири

TABASSUM

ТАРКИ ОДАТ — АМРИМАҲОЛ

Бир киши очқўз эди. Ундан қутулишга чора излаб шифокорга борди:

- Доктор, очқўзликка қарши дорингиз борми?
- Албатта, ҳозир, мен сизга ёзиб бераман.
- Илтимос, кўпроқ, кўпроқ ёзинг!

ОРЗУГА АЙБ ЙЎҚ

Икки ҳаваскор футболчи суҳбатлашиб қолди. Биринчиси деди:

- Мен худди акамга ўхшаб мингта гол уришни орзу қиламан.
- Ў, акам худди Пеледай зўр футболчи экан-да, қачон мингта гол урди?
- Нима деясан? Акам мингта гол ургани йўқ, шунча гол уришни орзу қилади, холос.

YON DAFTARCHANGIZGA

Ота билан орсииз талашар.

Ўзбек халқ мақоли

МУАССИС:

«КАМОЛОТ»
ЁШЛАР ИЖТИМОЙ ҲАРАКАТИ
МАРКАЗИЙ КЕНГАШИ

Газета Ўзбекистон Республикаси Матбуот ва ахборот агентлигида 2007 йил 19 апрелда № 0242 рақам билан рўйхатдан ўтган.

ISSN 2010-6998



Бош муҳаррир:

Ашуrow Салим Тўраевич

Тахрир ҳайъати:

Баҳодир Фаниев, Меҳриддин Шуқуров (бош муҳаррир ўринбосари — «Turkiston»), Элмурод Нишоннов (масъул котиб — «Turkiston»), Ирина Кочергина (бош муҳаррир ўринбосари — «Молодёжь Узбекистана»), Елена Калинина (масъул котиб — «Молодёжь Узбекистана»), Рустам Қосимов

Навбатчи муҳаррир:

Назарова Майсара Тошевна

Саҳифаловчи:

Рўзиев Зафар Хусанович

Газета тахририят компьютер марказида терилди ва саҳифаланди.

Манзилимиз: 100083, Тошкент, Матбуотчилар кўчаси, 32.
Телефонлар: (371) 233-95-97. (371) 233-79-69
e-mail: info@turkiston.uz

«Шарқ» нашриёт-матбаа акциядорлик компанияси босмахонасида, А-3 форматда чоп этилди. Ҳажми — 2 босма табок. Корхона манзили: «Буюк Турон» кўчаси, 41.

Индекс: 203, 3203

Баҳоси келишилган нархда.

Буюртма Г-943.
Адади — 8391
Босинга топшириш вақти — 21.00
Топширилди — 02.00
ЎЗА якуни — 01.50

Офсет усулида босилган.

1 2 3 4 5 6